





# Акафист

## СВЯТОМУ МУЧЕНИКУ

### Фанурию Родосскому

---

#### Кондак 1

Избранный воине Христов, смертию страдальческою от смерти вечныя избавивыйся и жизни вечныя приобщивыйся, похвальное пение приносим ти, добропобедне Фанурие, всечестную память твою празднующе. Ты же, теплый молитвенниче наш, услыши мольбы наша и вознеси я ко Господу, да милостив будет к нам и спасет нас от погибели вечныя, вопиющих ти:

Радуйся, мучениче Фанурие, преславный чудотворче.

#### Икос 1

Ангелов Творец и Господь сил яви тя, славне Фанурие, Церкви Своей мученика тверда и веры поборника. Мы же, подвиги страданий твоих восхваляя, ихже за веру Христову мужественно претерпел еси, воспеваем ти сице:

Ра́дуйся, Го́спода Иису́са все́м се́рдцем  
возлю́бивый.

Ра́дуйся, до конца́ Ему́ ве́рный пребы́вый.

Ра́дуйся, любве́ ради́ ко Го́споду живота́  
своего́ не пощади́вый.

Ра́дуйся, за и́мя Его́ ду́шу свою́ положи́вый.

Ра́дуйся, Христа́, и́стиннаго Бо́га,  
испове́дниче.

Ра́дуйся, неустраши́мый Христо́в во́ине и  
подви́жниче.

Ра́дуйся, му́чениче Фану́рие, пресла́вный  
чудотво́рче.

## **Конда́к 2**

Ви́дяще лю́дие ико́ну твою́, пресла́вне Фану́рие,  
ю́же по ле́тех мно́зех це́лу и невреди́му на ме́сте  
дре́вняго хра́ма обрётше, чудеси́ сему́  
удивля́хуся и Бо́гу, дарова́вшему им о́браз тво́й  
святы́й, во умиле́нии воспева́ху: Аллилу́иа.

## **И́кос 2**

Си́лу ве́ры твоея́ показу́я, му́чениче  
многострада́льне, дарова́ тебе́ Всемогúщий  
Госпо́дь да́р чудотворе́ний, ихже́ чрез о́браз тво́й

святѣй богáтно на ны́ изливáеши. Сего́ рáди  
восхваля́ем тя́, глаго́люще:

Рáдуйся, мучéния многовѣднáя за Христа́  
дóблестне претерпéвый.

Рáдуйся, дáже до крóве во исповéдании  
Христóве послужѣвый.

Рáдуйся, страдáнием Христóвым  
подражáвый.

Рáдуйся, мученический конéц жити́я своего́  
приéмый.

Рáдуйся, огнём всесожжéнный, во обителех  
ра́йских ны́не пребывáяй.

Рáдуйся, тáмо о нас пред Престо́лом Бóжиим  
ходáтайствуяй.

Рáдуйся, мучениче Фану́рие, преслáвный  
чудотво́рче.

### **Конда́к 3**

Си́лою Бóжиею укреплénный, христиáнином  
бы́ти себé небоязненно исповéдал еси́,  
страда́льче Христóв, и за Гóспода, Творца́ и  
Искупи́теля твоего́, вся́ страда́ния до конца́  
претерпéл еси́, вы́ну к Немú очеса́ своя́ возводя́,  
вопию́щи Ему́: Аллилу́иа.

### И́кос 3

Име́я ны́не ра́дость ве́чную в небе́сных  
селе́ниях, не преста́й и о на́с, земноро́дных, у  
Престо́ла Вседержи́телева моли́тися, да  
ниспо́слет на́м Ца́рь Сла́вы ми́лости Сво́я  
бога́тыя, и́миже облагодéтельствовани бы́вшие и  
Го́спода благода́ряще, тебе́ воспоём си́це:

Ра́дуйся, чуде́с сокрови́ще неоскудева́емое.

Ра́дуйся, исцелéний исто́чнице  
неисчерпа́емый.

Ра́дуйся, му́чеников пречестны́х украше́ние.

Ра́дуйся, Це́ркви пресла́вный свети́льниче.

Ра́дуйся, сосу́де, благода́тию  
преиспо́лненный.

Ра́дуйся, крине́ благоуханны́й, в небе́сных  
обите́лех процвётший.

Ра́дуйся, му́чениче Фа́нурие, пресла́вный  
чудотво́рче.

### Конда́к 4

Бу́ри гоне́ний на Це́рковь Христо́ву не убо́ялся  
еси́, Фа́нурие всечестне, и до́блй во́ин ца́ря  
земна́го бы́в, во́ин неустраши́мый Ца́ря  
Небе́снаго яви́лся еси́, То́го пред все́ми я́ко

и́стиннаго Бо́га испове́дающе и вы́ну во сла́ве  
небе́сней вопи́юще: Аллилу́иа.

### **И́кос 4**

Слы́шавше ве́рнии лю́дие о по́двиге  
испове́дания твоего́, му́чениче пресла́вне, от  
всѣх концевъ земли стека́хуся ко хра́му твоему́ с  
ве́рою, яко благода́тию Бо́жиею и по сла́вней  
му́ченичестей кончи́не твоей мно́гая и  
пресла́вная чудеса́ и исцелѣ́ния содева́еши. Сего́  
ра́ди и мы́, недостой́нии, к по́мощи твоей  
прибега́ем и воспева́ем ти́ си́це:

Ра́дуйся, удиви́ение А́нгелом бы́вый.

Ра́дуйся, святы́х ликъ возвесели́вый.

Ра́дуйся, те́плый на́ш моли́твенниче.

Ра́дуйся, пред Бо́гом на́ш засту́пниче.

Ра́дуйся, о́браз кре́пости духо́вныя на́м  
яви́вый.

Ра́дуйся, ага́рянское нече́стие посра́мивый.

Ра́дуйся, му́чениче Фа́нурие, пресла́вный  
чудотво́рче.

### **Конда́к 5**

Боготе́чною звездо́ю в Це́ркви Правосла́вней  
сия́еши, испове́дниче Христо́в Фа́нурие, све́том

Божественныя благодати путь ко спасению нам указуя, да Царствия Божия достигши, Отцу Небесному воспоем: Аллилуиа.

### Икос 5

Видевше тя вернии, по повелению игемонову различными мучении истязуема: камением и палицами побиваема, железными орудиями терзаема, свещами опаляема и всего изранена в темницу ввержена, крепости и мужеству твоему дивляхуся. Ты же, вся страдания мужественно претерпевая, за мучителей твоих молился еси. Сего ради, вопием ти сице:

Радуйся, тяжчайшими ранами по всему телу изъязвленный.

Радуйся, во узилище мрачное заключенный.

Радуйся, за Христа палицами избиение претерпевый.

Радуйся, камением раздробленные составы имевый.

Радуйся, в темнице светом божественным озареный.

Радуйся, мучителей терпением своим посрамивый.

Ра́дуйся, му́чениче Фа́нурие, пресла́вный  
чудоотво́рче.

### **Конда́к 6**

Пропове́дник сло́вом и де́лом и́стины Христо́вы  
яви́лся еси́, святы́й му́чениче, не преклоня́йся  
пред и́долы богоме́рзкими, о́баче еди́ному  
Го́споду Вседержи́телю, в Тро́ице сла́вимому,  
покло́нение воздава́л еси́, из глуби́ны се́рдца  
взыва́я: Аллилу́иа.

### **И́кос 6**

Воссия́ша мно́гая чудеса́ от святы́я ико́ны  
чудоотво́рца Фа́нурия, к нейже ве́рнии с ве́рою и  
любо́вию припа́дающе, благода́рение засту́пнику  
своему́ и моли́твеннику воздаю́т и, святу́ю  
па́мять его́ воспомина́юще, вопию́т пе́сенно:

Ра́дуйся, победоно́сче, Бо́гом просла́вленный.

Ра́дуйся, во́ине Христо́в, враго́м  
неодоле́нный.

Ра́дуйся, все́м за и́стину терпя́щим  
утвержде́ние.

Ра́дуйся, во искуше́ниях пребыва́ющим  
укрепле́ние.

Ра́дуйся, я́ко ико́ну твою́ во утеше́ние ве́рным  
яви́л еси́.

Ра́дуйся, я́ко то́ки исцелéний от не́я недужным излия́л еси́.

Ра́дуйся, мучени́че Фану́рие, пресла́вный чудотво́рче.

### **Конда́к 7**

Хотя́й нечестивый и́гемон улови́ти се́рдце твоё к преле́сти и́дольстей, повеле́ ти принести́ же́ртву бо́гом лживым; ты́ же, велéние богопротивное отринув, у́глие горя́щее в руку́ своёю держа́, велегласно́ воспева́л еси́ Христу́: Аллилу́иа.

### **И́кос 7**

Но́вое чу́до яви́ Господь на тебе́, мучени́че всехва́льне: зве́рие бо дивии, на растерза́ние твоё мучи́телями угото́ваннии, оба́че благода́тию Бо́жиею укрощённии, ве́лий ка́мень, под ни́мже те́ло твоё страда́льческое пребыва́ше, отвалити́ тща́шеся. Мы́ же, дивя́ся чудеси́ сему́, восхваля́ем тя́ си́це:

Ра́дуйся, упова́нием на Бо́га Жи́ва укрепле́нный.

Ра́дуйся, кро́вию своёю, ри́зу души́ своея́ убели́вый.

Ра́дуйся, же́ртва благополу́чна Бо́гу яви́вшийся.

Ра́дуйся, Йо́ву в терпе́нии уподо́бивыйся.

Ра́дуйся, му́ченическаго ли́ка восполне́ние.

Ра́дуйся, и́мене Христо́ва прославлéние.

Ра́дуйся, му́чениче Фа́нурие, пресла́вный  
чудотво́рче.

### **Конда́к 8**

Стра́нствие земно́е соверши́в и пу́ть  
му́ченический до́бльственне проше́д, свя́те  
Фа́нурие, го́рних высóт дости́гл еси́, Христу́  
нелóжно послужив; сего́ ра́ди, при́зри на ны́,  
ве́рно тебе́ моля́щаяся, и помози́ нам: даде́ся бо  
тебе́ от Го́спода благода́ть оби́димым бы́ти  
засту́пником, немощны́м – целите́лем,  
скорбя́щим – утешите́лем, пою́щим благода́рно о  
тебе́ Бо́гу: Аллилу́иа.

### **И́кос 8**

Ве́сь ра́дости божество́вныя испо́лненный, ду́шу  
свою́ в ру́це Го́споду преда́л еси́, богоблаже́нне  
Фа́нурие. Мы́ же, ви́дяще тя́ на ико́не твоёй  
огне́м сожигáемаго и Го́спода сла́вющаго,  
восхваля́ем тя́ си́це:

Ра́дуйся, я́ко ве́ру и упова́ние на Бо́га до  
конца́ сохрани́л еси́.

Ра́дуйся, я́ко сего́ ра́ди венце́м му́ченическим  
уве́нча́лся еси́.

Ра́дуйся, испове́данием своимъ Бо́гу угоди́вый.

Ра́дуйся, оби́тели небе́сныя унасле́довавый.

Ра́дуйся, у Престо́ла Бо́жия о нас моли́твы  
возно́сяй.

Ра́дуйся, о призыва́ющих и́мя твое́  
непреста́нно пеки́йся.

Ра́дуйся, му́чениче Фа́нурие, пресла́вный  
чудо́творче.

### **Конда́к 9**

Вся́кое естество́ А́нгельское удиви́ся му́жеству  
твоему́, предивне Фа́нурие: не убо́ялся бо еси́  
муче́ния ве́лия за Христа́ претерпе́ти; сего́ ра́ди  
науча́еши и нас в злострада́ниях не  
малоду́шествовати, но за вся́ благодарити Бо́га,  
взыва́я: Аллилу́иа.

### **И́кос 9**

Ветии́ многовещаннии не возмо́гут изре́щи тебе́  
досто́йныя похва́лы, му́чениче всесла́вне, и  
позна́ти си́лу Христо́ву, е́юже обле́клся еси́, я́ко  
бронёю. Мы́ же, по́двиги твоя́ восхваля́я,  
воспева́ем ти́ си́це:

Ра́дуйся, во Христе́ утешéние имéвый.

Ра́дуйся, во́ине Христóв, враги́ злоко́зненныя победивый.

Ра́дуйся, я́ко вся́ страда́ния му́жественне претерпéл еси́.

Ра́дуйся, я́ко мучи́телей твои́х посрамил еси́.

Ра́дуйся, кро́вь за Христа́ излия́вый.

Ра́дуйся, за Него́́ тéло своё́ на мучéния преда́вый.

Ра́дуйся, мучени́че Фану́рие, пресла́вный чудотво́рче.

### **Конда́к 10**

Хотя́й Влады́ка Христóс просла́вити тя́, мучени́че Фану́рие, внуши́ архипа́стырю́ Це́ркви Родо́ския возвести́ хра́м во и́мя твоё́ на ме́сте, иде́же обрéтена бы́сть ико́на твоя́, да вси́ притека́ющие к многоцеле́бней по́мощи твоёй, воспева́ют в нём а́нгельскую пе́снь: Аллилу́иа.

### **И́кос 10**

Стена́ и прибе́жище ты́ еси́, уго́днике Бо́жий, с ве́рою и упова́нием тебе́ моля́щимся: непреста́нно бо ходата́йствуеши ко Го́споду о

всѣхъ почитающихъ память твою. Приими́ убо и от насъ похва́льная пѣ́ния сия́:

Ра́дуйся, я́ко жи́знь вѣ́чную чрезъ мучѣ́ния насле́довал еси́.

Ра́дуйся, я́ко страда́нии твои́ми несконча́емую ра́дость обрѣ́л еси́.

Ра́дуйся, го́рняго Сио́на досто́йный насле́дниче.

Ра́дуйся, с небожи́тели блаже́нный совсе́льниче.

Ра́дуйся, с небе́с на насъ призира́яй.

Ра́дуйся, невиди́мо намъ помога́яй.

Ра́дуйся, му́чениче Фану́рие, пресла́вный чудотво́рче.

### **Конда́к 11**

Пѣ́ние похва́льное воспева́ем ти́, сла́вне Фану́рие, ты́ бо все́го себѣ́ в же́ртву благоуха́нную Го́сподеви принѣ́сл еси́, поя́ Ему́ до послѣ́дняго издыха́ния: Аллилу́иа.

### **И́кос 11**

Светоза́рная звезда́ яви́лся еси́ на небе́ церко́внемъ, благода́ти Боже́ственныя испо́лненная и вся́ собо́ю оза́ряющая,

преблаже́нне Фану́рие; сего́ ра́ди помози́ нам в Ца́рствие Небе́сное шествовати́ путе́м спаса́тельным, вопи́ющим ти́ похва́льная сия́:

Ра́дуйся, ду́ши на́ша све́том ве́ры Христо́вы просвеща́й.

Ра́дуйся, то́ки чуде́с твои́х ве́рныя напая́й.

Ра́дуйся, оби́димых засту́пниче.

Ра́дуйся, си́рых покрови́телю.

Ра́дуйся, Це́ркви твёрдый а́даманте.

Ра́дуйся, ве́ры непоколебимый сто́лпе.

Ра́дуйся, му́чениче Фану́рие, пресла́вный чудотво́рче.

### **Конда́к 12**

Благода́ть свы́ше ти́ да́нную, позна́вше, и я́ко засту́пника своего́ тя́ иму́ще, три́е иере́и Бо́жии моля́ху тя́ со слеза́ми, пресла́вне Фану́рие, да от плéна ага́рянскаго́ их изба́виши, да возмо́гут во хра́ме Госпо́днем воспева́ти непреста́нно: Аллилу́иа.

### **И́кос 12**

Пою́ще Бо́га, дивна́го во свята́х Свои́х, похва́льное пе́ние прино́сим ти́, блаже́нне Фану́рие: ты́ бо, в вы́шних пребыва́я, оба́че и

ни́жних не оста́вляеши и о нас пред Престо́лом  
Его́ ходата́йствуеши. Сего́ ра́ди во умиле́нии  
серде́чном взыва́ем ти́ си́це:

Ра́дуйся, Бо́гом на землі просла́вленный.

Ра́дуйся, ли́ку му́ченическому на небеси́  
сопричте́нный.

Ра́дуйся, чуде́са пресла́вная по сме́рти твоёй  
явля́й.

Ра́дуйся, моли́твами твои́ми ве́рных  
укрепля́й.

Ра́дуйся, му́жеством твои́м А́нгелы  
возвесели́вый.

Ра́дуйся, на небесе́х черто́г пресве́тлый  
унасле́довавый.

Ра́дуйся, му́чениче Фа́нурие, пресла́вный  
чудотво́рче.

### **Конда́к 13**

Овсехва́льный страстоте́рпче Христо́в, му́чениче  
Фа́нурие, приими́ похвалы́ сия́ от нас,  
недостойных, с любóвию тебе́ приноси́мая, и  
предста́тельством твои́м у Престо́ла Бо́жия  
испроси́ нам от вся́ких бе́д, скорбе́й и напа́стей  
сохрани́тися и от муче́ний в бу́дущем ве́це

избавитися, да со всіми святими воспоём на небесі пѣснь: Аллилуіа.

Этот кондак читается трижды, затем икос 1-й и кондак 1-й.

### **Моли́тва**

Освятѣй уго́днице Бо́жий, му́чениче Фану́рие! По́двигом до́брым подвиза́вся на землі, восприя́л еси́ на Небесе́х вене́ц пра́вды, егѡже угото́вал е́сть Госпо́дь все́м лю́бящим Егѡ. Те́мже взира́юще на святѣй тво́й о́браз, радуемъ о пресла́внем сконча́нии жи́тельства твоегѡ и чтѣм святую́ па́мять твою́. Ты́ же, предстоя́ Престо́лу Бо́жию, приими́ моле́ния на́ша и ко Всеми́лостивому Бо́гу принеси́, о е́же прости́ти на́м всякое прегреше́ние и по́мощи на́м стати проти́ву ко́знем диавольским, да изба́вльшеся от скорбе́й, болѣзней, бе́д и напа́стей и всякаго зла́, благоче́стно и пра́ведно поживе́м в ны́нешнем ве́це и сподо́бимся предста́тельством твоѣм, а́ще и недостѡйни есмы́, ви́дети благая́ на землі живы́х, сла́вяще Еди́наго во святѣх Своѣх сла́вимаго Бо́га, Отца́ и Сы́на и Свята́го Ду́ха, ны́не и во ве́ки веко́в. Ами́нь.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НУЖЕ  
НЕБО**